

A india Nube Branca vive nunha reserva india.

Na súa tipi, que así se chaman as tendas onde viven as indias e os indios, construíu un foguete espacial con ramas de árbores e pedras que atopou no chan.

Nube Branca quería ser astronauta e viaxar co seu foguete espacial até a Lúa e así, de paso, poder visitar as estrelas que brillan no ceo cando é de noite.



Como se chama a protagonista?

Que quería ser de maior?

Un día, fixo unha cacharela para coller lume e poder prender o seu foguete, pero unha faísca saltoulle ás plumas que levaba na cabeza. Tivo que soprar moi forte para apagar a chama, e desde ese día lembrou que non se podía xogar co lume porque é perigoso.

Nube Branca decatouse de que non podería chegar soa até o espazo, así que decidiu pedir axuda aos seus amigos: a tartaruga Clarisa, o elefante Cacharrante e o camaleón Antón.



[Colle aire polo nariz e sóltalo pola boca
ffffffuuuuuuuu, fffffffuuu! como para
apagar unha cacharela]

[Repite os nomes das amigas e os amigos de Nube Branca]

O elefante Cacharrante dixolle a Nube Branca:

— Non te preocupes... collerei a miña trompa xigante e soprarei tan forte que te enviarei ao planeta que máis che guste do sistema solar.



Até que planeta quería ir Nube Branca?

Conseguiu chegar?

— Xenial, gustaríame ir até Saturno, que é un planeta que ten un anel arredor -contestou riseira Nube Branca. O elefante colleu aire coa súa trompa e soltouno soprando moitísimo ...sssh ...sssh ...sssh!, pero non conseguiu que Nube Branca chegara a Saturno.



O camaleón Antón ofreceu tamén a súa axuda, pois tiña unha lingua tan grande e tan longa que pensaba que podería enviar a nena a unha excursión até o planeta Marte, que é o que máis preto está da Terra.

O camaleón moveu a súa lingua cara a un lado e cara ao outro, cara arriba e cara abaixo, arredor da boca. Finalmente meteu a lingua na boca e volveu sacala lanzando a Nube Branca, pero non conseguiu achegala nin un chisquiño até Marte.



Que outro animal lle ofreceu a súa axuda?

Como a axudaría?

A tartaruga Clarisa dixo que podería levala ao espazo na súa cuncha, pero que camiñaba moi amodo.

Camiñaba tan devagariño, **poc, poc** que tardarían moito tempo en chegar a Venus ou a Xúpiter, que era o planeta máis grande de todos cantos había.


Nube Branca púxose triste porque lle parecía moi difícil ser astronauta. O certo é que non quería ir a Mercurio, que era o planeta que estaba máis preto do Sol, porque seguro que ía moita calor, pero si que lle prestaba ir a Urano ou a Neptuno, os planetas que máis lonxe estaban da Terra, pero tardarían moito en chegar a tartaruga e mais ela.



[Movemos os beizos poñendo unha faciana triste e mudándoa en cara de ledicia, de anoxo e de sorpresa. Que cousas nos fan sentir esas emocións?]

Por que se puxo triste Nube Branca?

A Cacharrante ocorréselle unha idea:
– Por que non invocamos a choiva para que
veña moita auga? Así poderemos navegar
nunha barca até o espazo.



Todos xuntos fixeron unha danza
da choiva cantando:
uca-tuca-puca,...
aca-taca-paca... ica-tica-pica...
oca-toca-poca... eca-teca-peca.

[Repite algunha parte da danza, pechando
os ollos e sen mirar o libro]

A danza da choiva deu resultado, e ao pouco tempo
comezaron a caer pingas de auga desde o ceo:
ploc, ploc, ploc... e a treboada era tan intensa
que o vento sopraba moi forte cara ao nordés...

Aínda así, a auga que enchoupaba o poboado non
era suficiente para navegar polo mar e chegar
até as estrelas.

**ffffff,
ffffff,
ffffff!**



[Respira polo nariz e sopra con forza imitando o vento do nordés]

— Xa sei!, -dixo desta volta o camaleón Antón-. E se lle pedimos emprestada a moto a un león que coñezo? Seguro que na moto poderemos chegar polo menos até Marte.

Entón, foron visitar ao León Ramón, que lles emprestou a súa moto para que puidesen viaxar nela. Os catro montaron na motocicleta e acendérona:

rrrrrrrrrrummmm,rrrrrrrrrrrrrrrrrrrrummmmm,rrrr
rrrrrrrrrrummm!!!!,

pero ao pouco de arrincar tiveron que deterse, porque picaron unha roda.



A quen lle pediron a moto?

Por que non puideron continuar a súa viaxe?

Os amigos xa non sabían que facer para axudaren a cumprir o soño de Nube Branca. A Clarisa ocorréuselle outra idea: pedir consello a un sabio que habitaba no lugar no que vivían. Ben seguro que podería darlles unha solución para arranxaren tal problema.

O sabio Octavio, que así se chamaba, abriu moito as súas orellas para escoitar o que tiñan que dicirle os catro amigos... e pensou que talvez podería tomar unha decisión para solventar a cuestión.

Octavio era un indio ao que lle gustaba moito a arte, así que chamou a un pintor que pintaba uns fermosos cadros.



Como se chamaba o sabio?

A quen chamou?